

名山縣志



名山縣志

光緒十八年  
本署開雕

光緒廿二年  
丙申重校本

序

名山兼唐宋元時百丈縣地當邛雅之衝爲蜀中西南通邛笮要道百丈驛以東地勢平行西則山嶺阨隘自來由成都有事於西南及西南夷不賓窺伺成都無不由此防守一不得人縣率被害非特係邛雅之利害抑亦全蜀之利害也漢唐之事遠矣宋初張忠樂李順之亂縣人曹光實與從子克明以鄉兵破賊保衛境土明季獻賊之亂張能奇劉文秀高承恩之徒蹂躪縣境至十餘年近年滇寇藍李之亂數竄擾邛雅之間名山土寇乘之而起縣三被兵賴團練得力逐之出境後與官軍犄角合勦方得安靖然誅

夷焚掠之禍已不勝其酷矣縣境廣袤纔數十里山川迫隘土瘠而民貧供億絡繹官民交困宰斯土者率兢兢循轍守職得告無罪年終受代而去爲幸其於山川之形勢風土之利病文獻之淵敞蓋無有人過而問者遵義趙悔予大令履任數月政事修舉搜求一方之掌故知自康熙季年前宰徐君元禧修縣志三十六卷後百七十年来無繼之者願求其書不得恐及今不修年歲益遠後將無從徵信乃考諸載籍稽諸故牘驗諸故老之遺聞間與其兄幼漁孝廉參互攷訂不及二年而書成舉以示余讀之綱舉目張意在網羅散佚徵引藝文不嫌過繁獨於歷代爭

戰之事與近年寇亂擾攘之迹散見各卷循省爲難  
倘得總爲一篇貫串始末著其得失以爲後人成鑑  
其於地方形勝利害不更瞭然易知乎念予所轄地  
南自金沙江以北越大渡河邛崃嶺爲重險盡清溪  
之黃泥坡而地漸平夷至名山金雞關而山特峻險  
可守爲一縣之險又東數十里而地復平迤邐盡邛  
州北境首尾延綿千餘里皆蜀中通西南夷故道今  
雖幸無事而安不忘危古有明訓因閱斯志爰撮舉  
書中大要弁諸簡首復悔予大令亦以自省酌焉  
光緒歲壬辰十月  
賜進士出身榮祿大夫

特按建昌兵備道張華奎拜撰